

收靨後復出疹者此餘毒也散之兆不必治之

夾班 六十

痘疹夾班與夾疹不同蓋疹則細碎有形班則成片無形也凡痘瘡初出有片片紅腫如綿紋者有紅暈與地皮相平而全無興起之意者是皆夾班證也班以熱毒鬱於血分而浮於肌肉之間乃足陽明胃經所主或以寒邪陷入陽明鬱而成熱者亦致發班俱宜涼血解毒但使班退而痘見者吉否則皮膚斑爛瘡易搔痒而皮嫩易破也又有赤班成塊其肉浮腫結硬者乃名丹瘤其毒尤甚瘡未成就此必先潰不可治

也

一治斑之法大抵斑在起發之前者多用表散在灌膿之後者多用解利如遍身通紅者其治亦同

一痘出夾斑輕者只以升麻葛根湯加石膏玄參甚者宜人參白虎湯合六味消毒飲

一風寒外感表邪不解而夾斑者宜荆防敗毒散或加石膏玄參

一班色紫赤而大便秘結者宜四順清涼飲利之斑既已退卽宜用四君子之類以固其脾庶可免其內陷

程氏曰凡治夾班急宜涼血解毒以羌活散加酒炒芍藥紫草
紅花蟬退木通官桂糯米連進數服班退後以保元湯加木
香豆蔻煎服以解紫草之寒防其泄瀉○如痘中夾疹治亦
同此如稍遲則恐變成黑班爲難治矣

一痘瘡結痂之後而見班者此餘毒煎熬血分必致潰爛宜黃
連解毒湯加當歸芍藥黃芩石膏甚則大連翹飲○若熱毒
薰蒸於內大便膿血臭穢而見班者此胃爛之證不可治
一發班潰爛者以救苦滅瘢散敷之

凡小兒出痘而晝夜啼哭者當辨其虛實表裏而治之其有內
未得出或外未得散而啼哭者此毒氣不解之使然也有陽
邪火盛紅赤掀突而啼哭者此痘盤疼痛之使然也有心腎
本虛邪熱乘陰而啼哭者此或以神志不攝或以煩熱不寧
之使然也有飲食不節或偶停滯而啼哭者此胃氣不和腹
痛腹脹之使然也知此之由而辨得其真則內未出者表之
托之外未散者解之化之火之盛者清其熱神之虛者養其
陰若痘毒本微而無故啼哭者多由飲食內傷或二便秘結
此或去其停滯或通其壅閉務令表裏和暢營衛通行則神

竟安泰而痘無不善矣或謂啼哭非痰卽熱而不究其本則失之遠矣

大小便閉 六二

凡痘疹小便欲其清而長大便欲其潤而實則邪氣不伏正氣不病若小便利者大便必實雖二三日不更衣者無碍也若小便少則病必進小便秘則病必甚以火盛故也但初熱時大便不宜太實若二三日不行宜微潤之不然恐腸胃不通則營衛不行而瘡出轉密惟起發之後大便却宜堅實若太實而四五日不行恐熱盛難靨亦宜微利之

一痘疹小水不利而熱微者宜導赤散熱甚而小水不利者宜八正散

一痘疹發熱時大便秘結不行而內外俱熱有不得不通以疏其毒者輕則柴胡飲子甚則三黃丸再甚則承氣湯

一自起發後以至收靨凡大便不行而火不盛或虛弱不可通利者只宜用猪胆導法或以醬瓜一條如指許導之卽出切不可輕用利藥

一大小便俱不通而內熱甚者八正散或通關散酌宜用之

一熱毒內盛而痘瘡乾黑倒陷煩躁便結者百祥丸或承氣湯

然宜慎用毋輕易也

一痘後餘熱不盡內陷膀胱而小水不利者導赤散或五苓散
大便不通者四順清涼飲

陳氏曰凡痘瘡四五日不大便用嫩猪脂一塊以白水煮熟切
如豆粒與食之令臟腑滋潤亦使瘡痂易落切不可妄投宣
泄之藥以致元氣內虛多傷兒也

薛氏曰前證若因熱毒內蘊宜用射干鼠粘子湯解之或發熱
作渴或口舌生瘡咽喉作痛並宜用之

目雖肝之竅而實五臟六腑之精氣皆上注於目故其赤脉屬
心瞳子屬腎白珠屬肺黑珠屬肝裹約屬脾又太陽爲上綱
陽明爲下綱少陽循外眥太陽出內眥此其部分各有所主
故可因證以察其本也然痘瘡之病目而爲瘡爲翳者多由
火炎於內而熱以生風風熱散於諸經因多紅赤腫痛之患
故治此者亦當察其所屬而因證以調之也

一戴眼證凡痘瘡灌膿之後或大汗大瀉之後多有目睛上吊
或露白者謂之戴眼此精氣爲膿血汗液所耗乃太陽少陰
真陰虧竭大虛之證蓋太陽爲上綱血枯則筋急所以上吊

也速宜大補氣血以六物煎六氣煎或十全大補湯之類主之其有以此爲風熱而散之解之者是皆速其死也○若七日以前見此者多不治或無魂失志不省人事者亦不治一痘瘡目赤腫痛翳障等證無不謂之風熱故古方亦多用清火散風等劑夫痘瘡之火由中生目爲肝竅肝主風木而病在目故云風熱實以風生於火由內熱也所以凡治目赤目痛者不必治風但治其火火去則風自息矣何也蓋內生之風與外感之風不同外感之風升之散之則解散而去內生之風而再加升散則火愈熾而熱愈高矣常見治目多難救

而寒涼反以傷脾者正以升降相雜而用藥有不精耳經云
高者抑之果何謂乎今如古方之治火眼凡用洗肝散及洗
肝明目散芍藥清肝散之類總不如良方龍胆瀉肝湯而良
方瀉肝湯又不如加味龍胆瀉肝湯之爲得宜也

一痘瘡眼中流淚赤痛或多眼眵此肝火之盛也宜清解之以
加味龍胆瀉肝湯或抽薪飲加木賊蟬退之類主之若大便
結閉不通者亦可少加大黃

一痘瘡入眼腫痛或痘後生翳膜者宜蒺藜散蟬菊散或通神
散外以秦皮散洗之

一痘瘡目病熱少風多而昏暗澁痛眇淚羞明翳障者宜密蒙花散亦以秦皮散洗之

一痘後眼閉淚出不敢見明者此內火不清而陽光爍之故畏明也宜洗肝明目散

一痘後眼皮風毒赤爛或痛或痒燥澁羞明多眇淚者秦皮散洗之

一痘瘡靨後精血俱耗而眼澁羞明光短倦開或生翳障者宜四物湯甚者六物煎加木賊蟬退白蒺藜

一痘班入眼在白珠上者不必治久當自去惟在黑珠上宜治

之當清肝火

一凡病目熱者最宜忌酒及椒薑牛羊雞鵝鴨一應熱物并雞鵝鴨蛋皆不可用以防連綿不愈之患

一痘瘡熱毒傷目凡必用之藥如生地芍藥麥門冬山梔玄參草決明連翹黃芩黃連肝熱者龍胆草陽明實熱者石膏石斛腎火盛者黃柏知母三陰俱熱者地骨皮火浮不降者木通澤瀉翳障不去者木賊草蟬退白蒺藜氣虛者人參黃芪血虛者當歸熟地但火炎於上者不宜升陰虛於下者不宜泄是皆治眼之大法

一痘瘡護眼法宜錢氏黃柏膏爲佳從耳前眼皮上下顴面間日塗三四次可以護眼稀痘

一用點藥者凡目中生痘或食發物或熱毒太盛上蒸目竅以致熱痛或生翳障切不可妄用一切點藥蓋其非毒卽冷必致寒熱相激反以爲害惟余之金露散乃爲相宜可間用之以解熱痛之急

徐氏曰痘之毒氣自裏達表故有目病治宜活血解毒而已活血不至熱解毒不至寒但得活血毒散則目疾自愈

痘癰痘毒

六四

又痘母見前怪痘形證

痘發癰毒者亦名痘母經曰痘前發母者凶痘後發母者半吉
半凶大都毒發不透必發癰疽故蘊結於經絡之間然其壅
結也猶無足慮而惟其不能消散及治之不得其法則乃爲
可慮然散之之法當之要領其在虛實之辨而已如痘癰之
有大毒者不得不爲解毒有大熱者不得不爲清火俟火毒
畧清便當調理脾氣其有外雖見熱而內本不足者則當專
用托法務令元氣完固飲食不減則毒無不化何害之有若
不察根本強弱而但知攻毒清火則無不傷脾多致飲食日
減營氣日削膿血不化毒日以陷而痘變百出矣所以痘瘡

始末皆當以脾氣爲主苟不知此則未有中氣虛敗而痘能保全者

一痘癰初起壅盛疼痛元氣無損飲食如常者宜先用連翹歸尾煎或仙方活命飲以解其毒俟毒氣稍平卽當用四君歸芪之類以補托元氣

一凡用托裏之劑如癰毒內無大熱亦無便閉煩渴等證或素非強盛之質或以陰毒深陷形不掀突不紅腫不化膿痛有不甚者此其毒皆在內俱速宜用托裏之藥以六氣煎加金銀花甘草節防風荆芥白芷川山甲牛旁子之類如陽氣不

足者仍可加肉桂附子用酒水各半煎服或全用酒煎亦可
或托裏消毒散俱可酌用

一凡內熱晡熱而飲食少思者多屬脾胃不足血氣虛弱宜六
氣煎或溫胃飲加金銀花白芷○若癰毒色白而作痒者氣
虛也治同上○若根赤而作痒者血虛血熱也宜四物湯加
丹皮白芷○若腫而不潰者血氣虛也托裏消毒散或加肉
桂○若潰而不收者脾氣虛也宜六氣煎或六物煎加肉桂
一凡飲食如常而內外俱熱癰毒腫痛或煩渴或大小便俱熱
澁者宜大連翹飲或仙方活命飲可間用之○若飲食如常

為熱作痛或兼口舌生瘡者宜間用射干鼠粘子湯

一痘毒發癰有結硬實熱難解者宜排毒散

一痘後發癰癰者乃痘中未盡之毒留於經絡肢節而為癰腫也或解毒或清火各有所宜凡欲表裏兼解者宜柴胡麥門冬散欲潤腸解毒者宜消毒散及四順清涼飲欲涼血解毒者宜犀角地黃湯欲清火利便解毒者宜大連翹飲

疳蝕瘡

六五

陳氏曰凡痘瘡已靨未愈之間五臟未實肌肉尚虛血氣未復被風邪所搏則津液澀滯遂成疳蝕宜用雄黃散綿璽散等